

## V.

# Zbudžowanje wzajima za Serbski Dom mjez serbskim ludom.

Smoleř bě so přeswědčić dyrbjał, zo jeho nadžija na wukrajnu pomoc při dóspěću zaměrow za nowy Serbski Dom so njebě dopjelniła, hačrunjež bě so na tak wobćežne pućowanje w swojej wysokej starobje zwažil. Same njeluboznosće měješe ćěrpjeć a hrube nadpady ze strony šovinstow so w němskich časopisach na njeho, a wosebje na jeho zakitarja, fararja Jaroměra Hendricha Imiša-Hodžijskeho, činjachu, kotrež pak so z wotmachom wotrazychu přes wubjernu „apologiju Serbowstwa“, knihu\* wot fararja Imiša w Lipsku l. 1884 wudatu a po cyłych Serbach a Němcach sławnje znatu.

Hižo w léće 1882 bě so Michał Hórnik w swoim „přispomnjenju“ k protokollam wuprajił:

„Maćica Serbska stara so po swoich wyšnostnje wobtwjerdženych statutach za zdžěłanosć a moralnosć luda z wudawanjom serbskich spisow, a nětko přihotuje sebi tež widžomne sydlišćo — maćičny dom abo museum z knihownju a ze wšelakimi zběrkami. Hdyž Serbja sami po přikładze njeboh kublerja Michał Łahody z Bozankec za Maćicu Serbsku něšto wopruja a přeceljo našeho Serbowstwa nas podpjeraju, móže wona swoje khwalobne wotmyslenja dóspěć. Serbam budže to jara wužitne, druhim ludam pak z cyła nješkódne!

Jenož šovinstowje mjez našimi susodami, wot swojeje fantasije do błuda zawjedženi, prócowanje

\* Deutsche Antwort eines sächsischen Wenden. Der Pan-slawismus unter den sächsischen Wenden mit russischem Gelde betrieben und zu den Wenden in Preußen hinübergetragen, beleuchtet von Pfarrer Imisch zu Göda.